

Relatório visita fiscalizaun ba Laboratório Nasionál da Saúde

I. Introdusaun

Comissão de Saúde, Segurança Social e Igualdade de Género hala'o vizita fiscalizaun bazeia ba art. 92, art. 95, n.º 3 alínea e), kombinadu ho art. 145 n.º 3) husi Konstituisaun RDTL, no mos bazeia ba art. 35 alínea c), art. 79 alínea f) husi Rejimentu Parlamentu Nasionál.

Vizita ne'e realiza tuir deliberaun Komisaun iha loron 24 juñu 2020, hodi realiza vizita de fiscalizaun ba Laboratório Nasionál, inisia iha 25 juñu 2020.

II. Objetivu

Objetivu husi fiscalizaun ne'e maka atu observa, rekolla informasaun relasiona ho servisu Administrasaun, servisu Profisinál Saúde inklui Ekipamentus Medíku iha Laboratório Nasionál da Saúde.

III. Área tematika Komisaun

Konforme iha aneksu I, Deliberaun Parlamentu Nasionál nú. 2/2018, 27 juñu, hodi konstitui Comissões Especializadas Permanentes no defini área de kompetensia ba Komisaun F:

- a) Saúde;
- b) Seguransa Sosiál;
- c) Labarik sira, terseira idade no sidadaun portadores de defisiensia;
- d) Kombatentes luta ba libertasaun nasional;
- e) Igualdade Jéneru no la diskriminasaun.

IV. Kompozisaun Delegasaun

Membrus Komisaun sira-ne'ebé kompin iha vizita traballu ida ne'e kompostu husi:

1. Dep. Felix da Costa (Vise-Prezidente)
2. Dep. Helena Martins Belo (Sekretária)
3. Dep. Lusia Taeki (Membru)
4. Dep. Maria Gorumali Barreto (Membru)
5. Dep. Cidalia Mesquita Ximenes (Membru)
6. Teknika Komisaun nain 2
7. Jornalista PN 1
8. Jornalista GMN 2

V. Atividades Realizadas

1. Vizita sala Resepsaun

Iha vizita ne'e, Responsável Profisionál Saúde hatudu sistema baze de dados no rejista manual ba paciente sira-ne'ebé hasai raan iha Laboratóriu. Amostra sira ne'ebé rejista durante 2020, iha janeiru hamutuk 491, fevereiru 720, Marsu 622, abril 369, Maiu 460 no Juñu hamutuk 723 amostra (total husi fulan janeiru to'o juñu iha 3.385 amostras).

2. Vizita sala de Mikrobiolojia

Tuir esklaresimentu Pesoal Saúde ba Komisaun katak, iha Sala mikrobiolojia hala'o teste ba moras hotu-hotu hanesan sampel Sputum, urina, pus, THT no nsst. Depois halo teste ninia rezultadu haruka ba iha hospital. Halo teste mos ba aimoruk hirak ne'e resistente ka lae.

Ekipamentu sira iha sala Mikrobiolojia. Ekipamentu hirak ne'e balun di'ak, balun a'at no balun iha prosesu manutensaun. Kondisaun espasu iha sala refere klot. Mákina iha ona, no reajente sira atu halo teste mos kompletu ona no sei presiza treinamentu. Mákina Kovas, halo kompra iha tinan 2018 no hein de'it reajente para haruka ba Hospitais Referais maibé reajente to'o agora seidauk disponivel.

Formasaun ba utilizaun Ekipamentu. Relasiona planu formasaun OMS/WHO makaa sei responsabiliza halo kontratasaun ba Formador hodi fó treinamentu ba pessoal saúde sira hodi bele utiliza mákina foun sira-ne'e hanesan mákina teste ba hahan, bee no aimoruk.

Total funsionáriu iha Laboratóriu Nasionál da Saúde iha 90 pesoas, inklui funsionáriu administrativu. Iha futuru presiza tan rekursu umanu hanesan Médiku Especialista iha mikrobiolojia. Presiza halo expansaun ka alargamentu ba edifísiu laboratóriu Nasionál atu nune'e Diresaun idak-idak iha ninian fatin própriu.

Stock out. Bainhira akontese *stock out* ba reajente, Laboratóriu Nasionál halo de'it kuantifikasaun no haruka ba SAMES maka halo kompras. Iha *stock out* ba reajente tanba prosesu tenderizasaun entre SAMES ho Kompañia makaa resulta demora.

3. Vizita sala laboratóriu Covid-19

Responsável iha Sala Covid-19, esklaresa katak amostra sira ne'ebé husi Munisípiuno vijilansia sentinela. Iha fatin ida ne'e nia servisu makaa harahun vírus no hamate bele expostu nia matéria jenetika no kahur ninia reajente no sampel sira lori mai ne'e iha duni moras Covid-19 ka lae?

Presiza tebes Tékniku ne'ebé maka iha experiensia makaa'as no durante ne'e, tekniku sira halo hela teste ba influenza flu, ne'ebé laiha difikuldade atu introduz teste Covid-19.

Liga ho sistema rejistu ba dadus prepara iha *online*. Ba Tékniku sira ne'ebé maka labele tama servisu, sira bele servisu liu husi meius *online*.

Subsídium ba Liña Frente. Subsídium ne'ebé atribui ba Profisionais Saúde ne'ebé maka servisu iha laboratóriu la suficiente. Tanba servisu ne'e iha risku ba vida pessoal Saúde ho volume servisu ne'ebé. Hahú iha marsu durante Estadu Emerjénsia, servisu komesa segunda-feira to'o domingo no oras fila ba uma maka 20h00 -21h00.

Subsídium ne'ebé maka Governu aloka ba profisionais Saúde sira, laiha razaun ida maka esplika klaru relasiona ho fixasaun montante ne'ebé atribui, liu-liu hare ba risku sira ne'ebé maka iha. Iha mos servisu extra husi profisionais Saúde sira maibé laiha orsamentu ba oras extraordinárias.

Laboratóriu ida ne'e estabeselese iha 2010, depois de moras influensia H1N1 (*flu burung*) ne'ebé mosu iha Singapura. Momentu ne'eba rekursu humanus la suficiente no ekipamentus mos menus. Dala ruma mákina iha maibé reajente laiha, no bainhira reajente iha rekursu umanu maka laiha.

Iha 2015 mai oin, introduz ona teste a nível molekuler no bainhira volume servisu aumenta, mákina mos aumenta. Iha ona mákina halo teste PCR, molekuler ba influenza no Covid-19, mákina iha 2 no ativu hotu. Husi Laboratóriu Nasionál sempre konsulta ho Tékniku sira sira ne'ebé maka fa'an mákina sira ne'e, no karik iha fallansu ruma tékniku sira sempre fó apoiu diretamente.

Organizasaun Mundiál Saúde-OMS kontinua fornese reajente ba teste Covid-19 no apoiu rekursu umanu. Iha mos parseiru hanesan Austrália ne'ebé fornese consumáveis, reajente no rekursu umanu.

Máquina halo teste suficiente. Agora dadaun harahun vírus hirak ne'e ho prosesu manual ho durasaun kuaze oras 3 nia laran no harahun vírus total 24 amostras. Máquina 2 ne'e bele halo teste por volta 200 amostra durante oras 2 nia laran. Iha semana 2 tan mákina diagnostika atu halo ekstraksaun no halo rahun vírus sei to'o iha Timor- Leste, mákina refere iha tempu 30 minutos bele harahun 96 amostra.

4. Vizita sala Serologia

Iha fatin ida ne'e hare ba moras sira hanesan: HIV-SIDA, Sífilis, Hepatites B, Hepatites C, Tiroide na próstata. Teste sira husi laboratóriu referal sertifika pozitivu ona maibé tenki halo konfirmasaun klaru liu iha Laboratóriu Nasionál no depois maka fó sai rezultadu. Durante estadu emerjénsia fulan 3 nia laran teste ba moras hirak ne'e hala'o nafatin to'o agora. Aleinde ne'e pasiente balun mai mos husi klinika sira.

Komesa agora sei simu teste OPD pasiente sira no fó atendimentu ba pasiente hanesan bain-bain ka normal. Husi Janeiro to'o Juñu 2020, kazu HIV-SIDA pozitivu iha nafatin. Tuir dadus hatudu katak HIV-SIDA a'as liu iha munisípiu sira hanesan: Díli, Bobonaro, Suai no Baucau.

5. Vizita Laboratóriu teste ba Bee no Hahan

Iha vizita ne'e Diretór esklaresé ba Deputados Komisaun F kona-ba laboratóriu toxicologia ninian funsaun hodi halo teste ba qualidade Bee no Hahan ne'ebé konsumidór sira konsumu. Servisu Laboratóriu iha kordenasaun hamutuk ho AIFAESA no kuandu iha problema ruma kona-ba Hahan no Bee sira bele solisita mai Laboratóriu hodi halo teste. Iha ne'e mos halo teste ba aimoruk maibé mákina maka seidauk iha.

Kona-ba teste qualidade Bee, antes Estadu Emerjénsia iha fulan ida bele halo teste ho kuantidade 100 ba leten maibé durante janeiru to'o agora menus tanba Kompañia sira-ne'ebé halo produsaun la lori amostra mai atu halo teste. Iha Janeiru hamutuk 16 Kompañia, iha fevereiru hamutuk 13, iha marsu hamutuk 2, iha abril hamutuk 2, iha maiu hamutuk 13 no iha juñu hamutuk 11.

Diretór salienta katak laiha problema kona-ba ekipamentu, mákina suficiente hodi hala'o servisu. Liga ba reajente fulan hirak liu ba iha *stock out*. Relasiona ho servisu ba Munisípiu sira, iha 2019, pessoal laboratóriu halo mos teste ba Bee no Hahan to'o iha nível Munisípiu sira inklui iha Díli laran. Servisu iha laboratóriu bazeia ba Planu Anual no mos pedidu sira-ne'ebé hato'o husi comunidade, AIFASE no husi parte sira-ne'ebé interesadu.

Ekipamentu sira-ne'ebé sosa iha 2018, iha ekipamentu ka mákina 2. Mákina sira-ne'e utiliza mos ba halo teste material kosmestíka sira. Kona-ba pessoal sira-ne'ebé atu halo operasaun ba mákina sira-ne'e sei hetan formasaun no parte laboratóriu halo ona kordenasaun ho Organizaasaun Mundiál Saúde-OMS. Tuir Planu lolos ne'e, hetan ona formasaun husi OMS maibé tanba iha situasaun Estadu Emerjénsia entaun adia fali ba tempu seluk.

Iha parte seluk, responsável funsionáriu Laboratóriu esklaresé servisu Laboratóriu no relata mos funsaun laboratóriu nasionál iha 2 (Laboratóriu Patologia Klínika no Saúde Públika). Servisu ba Saúde Públika maka Diresaun ida-ne'e. Servisu pessoal saúde iha Laboratóriu dala ruma la'o di'ak no dala ruma mos ladi'ak. Parte infraestrutura (espasu) mos la permite hodi dezempeña servisu ho di'ak. Karik parte laboratóriu prezisa tan mákina entaun laiha fatin atu rai.

Se bele karik Nai Deputadu sira bele koalia ho Ministra Saúde no Dirijénte sira hodi alarga tan espasu iha laboratóriu, nune'e bele fasilita servisu pessoal saúde sira. Haree katak iha futuru iha aumentu ba tékniku ka funsionáriu sira.

Treinamentu ba funsionáriu. Ami hakarak iha treinamentu espesifiku ba tekniku laboratóriu kona-ba utilizaun mákina hodi halo prestasaun servisu ba comunidade iha Timor laran tomak.

Husi parte seluk, Laboratóriu bele hatama reseita ba Estadu, por ezemplu, Saúde Pública husi kompañia barak maka hakarak teste ba qualidade sasan, maibé durante ne'e gratuita de'it. Ida-ne'e lolos tenki aplika kustu ba kompañia sira. Iha 2014, hato'o ona pedidu ba aplikasaun kustu maibé la hetan aprovasaun husi Eis Ministru competente. Bazeia ba ami ninia kalkulasaun tinan ida Diresaun ne'e bele hatama reseita aproximadamente 2 milões de dólares amerikanu.

Valorizasaun servisu iha Laboratóriu. Ami tekniku sira-ne'ebé servisu iha ne'e laiha valorizasaun husi Superior tanba aplika rejime jerál no rejime espesiál ba tékniku sira. Servisu durante tinan 10 laiha promosaun ba grau no eskalaun salariál. Sira-ne'ebé ho Rejime Jerál hetan ona promosaun ba eskalaun no grau maibé ba ami sira ne'ebé ho Rejime Espesiál la hetan promosaun.

Kazu teste alkohol. Tékniku laboratóriu halo ona teste ba Tua sira-ne'ebé fa'an iha loja Chinesa no ninian rezultadu hatudu la tuir standar, balun persentajem alkohol iha 80%, 50% no 20%. Kazu ne'e to'o ona iha tribunal no ninia prosesu la'o ona durante tinan 6 maibé laiha rezultadu. Vendedor ne'e rasik mos fila ona ba nia nasaun orijem-China. Atu informa liu-tan, kazu ne'e nia prosesu julgamentu iha Tribunál dala 6 ona maibé laiha Defensór ba ami. Ne'e tanba sa?

Inundasaun. Iha tempu inundasaun moru protesaun ba Edifisiu Laboratóriu hetan estragos no to'o agora seidak hadi'ak. Husu ba Nai Deputadu sira atu koalia ho Ministra Saúde hodi aloka orsamentu ba rehabilitasaun moru refere. Solisita mos vizita trimestrál husi Distintos Deputados ba Instituisaun Saúde sira hotu.

6. Vizita Sala Laboratóriu Malária

Iha vizita observaun ne'e, Diretór Laboratóriu esklaresa liu-tan ba Komisaun katak iha fatin ne'e halo de'it diagnostiku ba moras Malária. Diagnostíku ne'ebé halo liu husi *Rapid Test* no ida-seluk uza mikroskópiu. Timor-Leste hetan ona susesu tanba konsege ona elimina moras malária. Kona-ba moras malária ne'ebé detekta importadu husi nasaun viziñu.

Pesoal sira-ne'ebé servisu iha parte sala malária iha ema nain 3. Tékniku sira nia servisu maka halo *cross check slide* sira-ne'ebé mai husi Munisípiu hodi sertifika lolos amostra sira-ne'e. Tékniku 3 ne'e iha ona koñesimentu ne'ebé akreditadu internasionálmente hodi garante servisu ba moras Malária.

7. Vizita Laboratóriu Referénsia Tuberkulose (TB)

Iha vizita ne'e, Diretóra Laboratóriu esklaresa ba Komisaun katak Timor-Leste iha Laboratóriu Referénsia Tuberkulose. Ekipamentu sira-ne'ebé instala iha Laboratóriu hetan apoiu husi nasaun Coreia inklui assessor nain 1.

Tuir survey ne'ebé realiza, grafikamente moras TB sei a'as nafatin iha Timor-Leste no Munisípiu Ermera maka okupa primeiru lugar. Konforme monitorizasaun ne'ebé halo iha Munisípiu sira katak aman sira maka afetadu barak liu husi TB entaun fó impaktu ba sustentabilidade ekonomia familiar.

Husi Parte Laboratóriu hato'o ona rekomendasaun ba Ministériu tutela oinsa maka bele prepara no ajuda comunidade atu mantein hela fatin ne'ebé ijiene ka saudável (pelu menus uma laran tenki nahe simentu).

Mákina Gene-Xpert sei koloka iha Munisípiu sira hanesan Baucau, Maliana, Suai no Maubisse (Ainaro). Mákina ne'e bele utiliza hodi halo teste ba moras oin-oin: Tuberkulose, Malária no Covid-19.

VI. Konkluzan

Depois hala'o tiha vizita observasaun ba Laboratóriu Nasionál Komisaun hato'o konkluzan hanesan tuir mai:

1. **Rekursu Umanu.** Iha Laboratóriu Nasionál sei prezisa tan profisional Saúde hanesan Mediku especialista iha área mikrobiolojia no pessoal Saúde sira seluk hodi haforsa servisu iha Laboratóriu.
2. **Formasaun Profissionál.** Seidauk iha formasaun ba profisional Saúde sira kona-ba utilizasaun Ekipamentu ka Mákina ne'ebé iha Laboratóriu.
3. **Espasu ka fatin servisu.** Tuir observasaun ne'ebé Komisaun halo, iha Sala Laboratóriu la adekuaudu hodi hala'o sira kna'ar no laiha espasu atu instala mákina sira.
4. Iha sala Laboratóriu ba teste Bee no Hahan, tuir Komisaun ninia observasaun hatudu katak durante Estadu Emerjénsia iha redusaun servisu liga ho teste Bee no Hahan ba Kompañia sira no husi Servisu Laboratóriu ba iha terrenu hodi rekolla amostra ka sampel. Seidauk iha Mákina kona-ba teste aimoruk.
5. **Promosaun grau salariál.** Tuir informasaun ne'ebé Komisaun rekolla husi funsionáriu sira hatudu katak Ministériu seidauk promove grau no eskalaun salariál ba profisional Saúde sira-ne'ebé ho Rejime Especial.
6. **Ekipamentus Laboratóriu.** Bazeia ba Komisaun nia observasaun Laboratóriu Nasionál iha ona Ekipamentu suficiente atu halo teste hanesan: raan (Covid-19, HIV-SIDA, nsst), bee, hahan no aimoruk, malária no Tuberkulose).

VII. Rekomendasaun

1. Rekomenda ba Ministériu Saúde atu esklarese klaramente ba profisionais saúde sira kona-ba atribuisaun subsídiu COVID-19, hodi evita kontestasaun no menus motivasaun ba pessoal sira nian servisu.
2. Rekomenda ba Ministériu atu tau atensaun ba alargamentu espasu servisu no instalasaun mákina Laboratóriu iha Laboratóriu Nasionál.

3. Rekomenda ba Ministériu atu implementa promosaun grau no eskalaun salariál ba professional saúde sira-ne'ebé ho Rejime Espesiál.
4. Rekomenda ba Ministériu atu defini programa sensibilizasaun no prevensaun kona-ba moras hada'et Tuberkulose, tuir dadus hatudu katak moras TB sei a'as iha Timor-Leste.
5. Rekomenda ba Ministériu atu regulariza liu-husi Diploma Ministérial kona-ba aplikasaun kustu ba teste Bee no Hahan iha Laboratóriu ba kompañia privada sira hodi bele hasa'e reseitas ba Estadu.

VIII. Apovasaun Relatóriu

Relatóriu vizita ne'e hetan apresiasaun no aprovasaun iha sede Komisaun iha loron 7 janeiru 2021, ho votus a favor 5, kontra 0 no abtensaun 3.

Relatóra,

Prezidente Komisaun,

Helena Martins Belo

Noé da Silva Ximenes "Buka Tuir"